

## Rau To Yoan Imbooda Muun 1 Jon—1 John

*Ngeu to inim ataam pait ve tagham nepoon poia ila to Maaron*

<sup>1</sup> Yei nivovotia saveen mata yaryaara pa ngeu to ipaghazonan ghiit pa saveen ve ngar to Maaron, ve inim ataam pait ve tagham nepoon poia. Muun kat, sawa to mbef eta ivot sone ve inim, ngeu tonowen inepneep. Ve ye izi inim inep toman ghei, ve niloon saveen toni ila ye tau avo, nighita pa matamai, ve nikisi pa nimamai. Tauto nighi-laal katini. *Lu 1:2; Yo 1:1+,14, 20:27; 2Pe 1:16*

<sup>2</sup> Tovenen ngeu to inim ataam pait ve tagham nepoon poia ila to Maaron, tauto ivot ighazon ve nighita wa. To muun ve inim, yesuru Tama tinepneep. Ve aazne, ye ivot ighazon payei ve nighita. Tauto nipariaan saveen toni, ve nivotia varu payam. Leso aghur ila toni ariana, ve anep matamim iyaryaar le alok. *Yo 1:4, 21:24*

<sup>3</sup> Tovenen mbef to yei nighita ve niloona, tauto nivotia payam. Leso yam anim alup gham toman ghei, ve itina Tamaan Maaron ve Natu Yesu Kresi talup ghiit tanim ee moghon. *Yo 17:21*

<sup>4</sup> Saveen tonene, nimbooda lesu itina lolood poia le poia kat. *Yo 15:11*

*Talaagh ila ghazona to Maaron*

<sup>5</sup> Saveen to niloona ila Yesu Kresi tau avo, tauto nivotia payam. Isaav tovene ighaze: Maaron, ye

ghazoonja tau. Ngar to ndoroom rita ineeq toni maau. *1Tim 6:16; Yems 1:17*

<sup>6</sup> Tovenen ighaze tasaav taghaze itiŋa Maaron lupuuŋ toit ee moghon, ve laghoon toit, tataghon ngar to ndoroom, nene tataghon saveeŋ onoon maau. Tagham kaarom. *2Kor 6:14; 1Yo 2:11*

<sup>7</sup> Ve ighaze laghoon toit, tataghon ghazoonja to Maaron inimale ye tau inepneep ila ghazoonja toni lolo, nene pale itiŋa talup ghiit tanim ee moghon, ve Maaron Natu Yesu siŋ toni ireu sosor toit isob ilale, ve igham ghiit tanjalaan ila Maaron mata. *Ep 1:7; Hib 9:14; Syg 7:14*

### *Taŋgooz sosor toit malep*

<sup>8</sup> Ighaze tasaav taghaze iit leed sosor eta maau, nene tagham kaarom pa tauud, ve saveeŋ onoon ineeq ila lolood maau. *Ro 3:9+,23*

<sup>9</sup> Ve ighaze tavotia sosor toit ila to Maaron, ye pale ireu di itaghon ngar denja\*

ve saveeŋ mbuaan toni. Ngar toit to denja maau, ye pale ireua isob ilale, lesu igham ghiit tanjalaan ila mata. *Mbo 32:5; 51:2; Yems 5:16*

<sup>10</sup> Tovenen ighaze tasaav taghaze iit tagham sosor eta maau, nene inimale tasaav pa Maaron taghaze ye ngeu to kaarom, ve tapatoon tauud taghaze saveeŋ toni ineeq ila lolood maau.

---

\* **1:9:** Maaron irau ireu sosor toit sorok maau. Pasa, ye le uraat pa ingabiiz tamtoghon ve ighur atia pa sosor todi. Eemoghon sawa to Yesu imaat izala ai pambaroon, ye imbaad suvun atia to sosor to tamtoghon toni. Pughu tonene to aazne, ighaze Maaron ireu sosor to tamtoghon toni, nene itaghon ngar denja.

## 2

### *Yesu Krisi, ye Volaan̄a toit*

<sup>1</sup> O ndinatug, you nambood saveen̄ tonene payam, lesó agham sosor sob ve ayoon ariana. Eemoghon ighaze tamtoghon eta itap ve igham sosor, iit leed n̄geu den̄ia eez to ivoolvol toit, ve igham avood ve isasavia saveen̄ toit ila to Tamaan Maaron, nene Yesu Krisi. *Ro 8:34; 1Tim 2:5; Hib 7:25*

<sup>2</sup> Ye imaat inim watoon̄rau, lesó ireu sosor toit ve itatan mbalmbali to Maaron. Uraat toni tonowen, ye igham pa iit moghon maau. Igham pa tamtoghon tisob to taan. *Yo 1:29; Ro 3:25; Kol 1:20; Hib 2:17*

### *Tamtoghon to ighaze iwatag Maaron, nene pale itaghon tutuun̄ toni*

<sup>3</sup> Ighaze mataad kisin Maaron tutuun̄ toni ve tataghon di, nene irau taghilaal taghaze iit tawatag Maaron. *Yo 14:15,21, 15:12*

<sup>4</sup> Ighaze tamtoghon eta isaav ighaze ye iwatag Maaron, eemoghon itaghon tutuun̄ toni maau, nene ye n̄geu to kaarom, ve saveen̄ onoon ineep ila lolo maau. <sup>5</sup> Eemoghon ighaze tamtoghon eta mata kisin Maaron alīna ve itaghooni, nene ipatoon̄na ighaze n̄gar to lolood pa Maaron ineep ariana ila lolo wa. Tovenen ighaze taghamgham tovene, nene irau tawatag taghaze iit taneep tun̄ia ila to Maaron. *Yo 14:23; 1Yo 3:24*

<sup>6</sup> Tovenen ighaze tamtoghon eta isaav ighaze: “You nanim Maaron le ve naneep tun̄ia ila toni,” nene ye irau itaghon n̄gar to Krisi irau sawa isob. *Mt 11:29; Yo 13:15; 1Pe 2:21*

*Ighaze taneep ila ghazonja to Maaron, nene pale lolood pa tamtoghon ve tagham poian di*

<sup>7</sup> Yam nditag to lolog payam kat, tutuun to nambooda payam ne, paghu payam maau. Nene tutuun mungina. Akaria lonjaani wa. Sawa to yam aghur ila muun, ve inim aazne, tutuun tonene ineeep tiam. *Wkp 19:18; Yo 13:34+; 1Yo 3:11*

<sup>8</sup> Eemoghon tutuun to nambooda payam ne, aazne inim paghu muul. Pasa muun, anoja ivot kat maau. Ve aazne, Kriisi igham anoja ivot. Ve yam paam apatoon anoja ivot wa. Pasa, ghazonja tau to Maaron isul ariana. Tauto ngar to ndoroom ighaze isob tonene. *Yo 8:12; Ro 13:12; Ep 5:8*

<sup>9</sup> Ighaze tamtoghon eta isaav ighaze: "You naneep ila ghazonja to Maaron," eemoghon ighur koi pa tonvetaz toni to Kriisi, nene ye inepneep ila ndoroom lolo sone. *1Yo 4:20*

<sup>10</sup> Ve ighaze tamtoghon eta lolo pa yes tonvetaz to Kriisi ve ighamgham poian di, nene ye inepneep ila ghazonja to Maaron. Tamtoghon tovene irau igham ngar eta to igham tau, ma ndita pida titap ve tipul ghurla todi ne maau. *Ro 14:13*

<sup>11</sup> Eemoghon ighaze tamtoghon eta ighur koi pa tonvetaz toni to Kriisi, nene ye inepneep ila ndoroom lolo. Ye le ghilaloon maau. Pasa, ngar to ndoroom ipoon mata wa. Tauto laghoon toni, ye itaghton ngar to ndoroom, ve ighilaal ataam to itagthoni ne maau. *2Pe 1:9; 1Yo 1:6*

*Saveen injarua yes ndolman ve ndipain papaghu*

12 Ndinatug,\*  
 you nambood saveeŋ tonene ilat tiam pasa, ila Yesu Krisi iza, Tamaan Maaron ireu sosor tiam isob ilale wa. *Mbanj 10:43; 1Kor 6:11*

13 Ve yam ndolman, nambood saveeŋ tonene ila tiam pasa, Ngeu to ineep muuŋ ve inim,†  
 yam awatag katini wa. Ve yam ndipain, nambood saveeŋ tonene ilat tiam pasa, yamŋa Ngeu Samia aparab ve alib pani wa.

14 Tovenen ndinatug, you nambood saveeŋ tonene ilat tiam pasa, yam awatag Tamaan Maaron wa. Ve yam ndolman, nambood saveeŋ tonene ilat tiam pasa, Ngeu to ineep muuŋ ve inim, yam awatagi wa. Ve yam ndipain, nambood saveeŋ tonene ilat tiam pasa, yam ayoon ariana, ve saveeŋ to Maaron ineep tunja ila lolomim irau sawa isob, ve yamŋa Ngeu Samia aparab ve alib pani wa. *Ep 6:10; Syg 12:11*

*Lolood pa mbep to taan toman ŋgar to taan malep*

15 Yam aghur lolomim pa ŋgar toman mbep to taan malep. Pasa, tamtoŋhon to ighaze ighur lolo pa ŋgar toman mbep to taan, nene irau lolo pa Tamaan Maaron maau. *Mt 6:24; Ro 12:2; Yems 4:4*

16 Ngar to taan, iit tawatagi wa: Lolood igham pa mbep to uliid, mbep naol naol to taan tigham mataad, ve tapakur tauud pa mbep toit. Ngar

---

\* **2:12:** Ndiran ngara pida tighaze saveeŋ 'ndinatug' tonene iza to yes Kristen tisob. Ve saveeŋ 'ndolman,' nene iza to yes Kristen muŋginadi. Ve saveeŋ 'yam ndipain,' nene iza to yes Kristen papaghu. † **2:13:** Ndiran ngara katindi tighaze Ngeu to ineep muuŋ ve inim, nene Krisi. Ughita 1 Yoan 1:1.

tovene inim pa Tamaan Maaron maau. Nene ngar to taan. <sup>17</sup> Taan toman ngar ve mbeb naol to taan to tamtoghon lolodi igham padi, nene pale tilaledi. Eemoghon tamtoghon to ighaze itaghon Maaron lolo, nene pale ineep le alok. *1Kor 7:31*

*Yes to tizorzoor Yesu aliŋa tighaze ye Mesia maau, nene tinim Krisi koia*

<sup>18</sup> Ndinatug, apatum gham! Pasa, sawa to Maaron ipasob uraat toni, tauto aazne taza pani wa. Muuŋ, tisaav payam tighaze: “Muri, Yesu koia‡

eez pale ivot.” Ve aazne, katindi tivot wa. Tovenen iit tawatag: Sawa to Maaron ipasob mbeb tisob, tauto taza pani wa. *Mk 13:6; 2Tes 2:3; 1Yo 4:3*

<sup>19</sup> Muuŋ, ndiran tonowen tiluplup toman ghiit. Eemoghon aazne, tipul lupuuŋ toit wa. Tovenen yes avaat tamtoghon toit kat maau. Inimale yes tamtoghon toit kat, tone irau tipul ghiit maau, ve tinepneep toman ghiit sone. Ngar to tighami, nene ipatoon di ighaze muuŋ, yes tamtoghon toit kat maau. *Mbarŋ 20:30*

<sup>20</sup> Eemoghon yam animale ndiran tonowen maau. Pasa, Maaron patabuanŋ igham tau Avuvu payam wa. Ve yam asob awatag saveeŋ onoon.

<sup>21</sup> You naghaze yam akankaan pa saveeŋ onoon, to nambood rau tonene ilat ne maau. Saveeŋ onoon, yam awatagi wa. Ve yam awatag: Saveeŋ onoon irau inim pughu pa kaarom eta maau. Pughu tonene to nambood rau tonene ilat tiam.

---

‡ **2:18:** Yesu koia tonene, yes Grika tiwaata ila taudi aliŋadi tighaze “Antikrais.” (Antikrais pughu tovene: Krisi koia, ma tamtoghon to ipakur tau ighaze igham Krisi ina.)

<sup>22</sup> Sei to ngeu to kaarom? Nene ngeu to izorzoor saveeñ ighaze: “Yesu, ye Mesia maau.” Tamtoghon tovene, ye inim Krisi koia. Ye ipul muri pa Krisi ve Tamaan Maaron paam. *1Yo 4:3; 2Yo 7*

<sup>23</sup> Pasa, tamtoghon tisob to tipul muridi pa Maaron Natu, nene Tamaan Maaron ineep toman di maau. Eemoghon ighaze tamtoghon eta ivotia ghurla toni ighazoon ighaze ye ighur ila to Maaron Natu, nene Tamaan Maaron paam ineep tomani, ve yesuru tilup di tinim ee moghon. *1Yo 4:15, 5:1; 2Yo 9*

*Iit irau takis saveeñ onoon tunjia ila lolood, ve tataghon pooz to Avuvu Patabuan*

<sup>24</sup> Tovenen saveeñ onoon to tisavia payam muun ve inim, matamim ingalngali ve akisi tunjia ila lolomim irau sawa isob. Leso aneep tunjia ila to Tamaan Maaron ve Natu Yesu Krisi. *Yo 14:23; 1Yo 1:3*

<sup>25</sup> Nepoon tovene itaghon saveeñ mbuaan to Yesu igham pait. Pasa muun, ye isaav ighaze iit pale tagham nepoon poia ila to Maaron itaghoni taghoni gha ila. *Yo 6:40, 17:3; 1Yo 5:11*

<sup>26</sup> Saveeñ tonene, you nambooda ilat tiam, lesa matamim imosmoos pa ndiran kaaromja to tighaze tipaghau gham pa ataam to Maaron.

<sup>27</sup> Eemoghon yam, Krisi igham tau Avuvu payam, ve Avuvu tonenen ineep toman gham irau sawa isob. Tovenen yes to tizoorn dug tighaze tipatoot gham pa Maaron aliña, ledi uraat eta payam maau. Pasa, Maaron Avuvu tau ipatoot gham pa mbeb to naol ne. Ve ngar to ye ipatoot gham pani, nene kaarom maau. Nene onoon moghon. Tovenen yam irau ataghon ngar tonenen, lesa aneep

tunĵia ila to Krisi irau sawa isob. *Yo 14:26, 16:13+; Hib 8:10+*

*Taneep tunĵia ila to Krisi, ve tasajan mulaaĵ toni*

<sup>28</sup> Ndinatug, aneep tunĵia ila to Krisi irau sawa isob. Leso sawa to ye imuul inim ve ipatoŋ tau ivot ighazonĵ, iit tamatughez pa tala tagharau sob, ve mayaad ila mata malep. *Ep 3:12; 1Yo 4:17*

<sup>29</sup> Yam awatag: Krisi, ye ŋgeu to ŋgar denĵia. Tovenen yam irau awatag aghaze: Tamtoghon tisob to titaghon ŋgar denĵia, nene Maaron igham di tinim paghu, ve tinim ye ndinatu wa. *Tit 3:5; 1Yo 3:7, 4:7; 3Yo 11*

### 3

*Iit taneep tanimale Maaron ndinatu*

<sup>1</sup> Aghita. Tamaan Maaron lolo pait ve ipakur ghiit kat. Pasa, ye ipoi ghiit ighaze tau ndinatu iit. Ve saveeĵ tonene, nene denĵia. Aazne, Maaron igham ghiit tanim ye ndinatu. Eemoghon yes to titaghon ŋgar to taan, tighilaal ghiit maau. Pasa, yes tighilaal Maaron maau. *Yo 1:12, 16:2+; Ro 8:15+*

<sup>2</sup> Yam ndiran tiou, lolog payam kat. Aazne, iit tanim Maaron ndinatu wa. Ve sa nepoŋ to muri pale taghami, nene takankaan pani. Pasa, Maaron ipaghazonĵan ghiit pa mbeb tonenen sone. Eemoghon iit tawatag: Sawa to Krisi imuul inim ve ipatoŋ tau ivot ighazonĵ, ve taghita katini, nene pale taneep tanimale ye tau. *Mt 5:8, Ro 8:29; 2Kor 3:18*

<sup>3</sup> Tamtoghon tisob to tighurghur matadi pa mbeb tonene, yes irau tigharaat taudi, lesu tinĵalaanĵ ila Maaron mata tinimale Krisi tau. *2Kor 7:1*



*Yes to tineep tunjia ila to Krisi, tinoknok ghamuun ngar samia maau*

<sup>4</sup> Tamtoghon tisob to tigham sosor, tiyel pa tutuun to Maaron. Pasa sosor, nene ngar to iyel pa Maaron tutuun toni. <sup>5</sup> Ve yam awatag: Krisi, ye le sosor eta maau, ve izi inim taan pa ireu sosor toit. *2Kor 5:21; Hib 9:26; 1Pe 2:22+*

<sup>6</sup> Tovenen ighaze tamtoghon eta ineep tunjia ila to Krisi, ye irau inoknok ghamuun ngar samia maau. Ve ighaze ngeu eta ighamgham ngar samia irau sawa isob, nene ipatoonja ighaze ye ighilaal Krisi sone. Tamtoghon tovene, iwatag Krisi maau. *Ro 6:1+,14; 1Yo 2:4*

<sup>7</sup> Ndinatug, ngeu eta itombaan gham ve ipaghau gham pa ataam to Maaron malep. Tamtoghon to titaghon ngar denjia inimale Krisi itaghoni, nene yes moghon to tineep denjadi ila Maaron mata. *Ro 2:13; 1Yo 2:29*

<sup>8</sup> Eemoghon ighaze tamtoghon eta ighamgham ngar samia irau sawa isob, nene ye ngeu to Sadan. Pasa, muun kat ve inim, Sadan ighamgham ngar samia. Eemoghon Maaron Natu izi inim taan, ve ipatoon tau ivot ighazoon, leso ireu uraat to Sadan isob ilale. *Yo 8:44; Hib 2:14*

<sup>9</sup> Tovenen yes to Maaron igham di tinim paghu, tighamgham sosor kat maau. Pasa, Maaron tapiri to igham di tinim paghu, nene inepneep todi irau sawa isob. Tovenen yes irau tinoknok ghamuun ngar samia maau. <sup>10</sup> Tovenen ataam to taghilaal Maaron ndinatu ve Sadan ndinatu, nene vene: Ighaze tamtoghon eta inoknok ghamuun ngar to denjia ila Maaron mata maau, nene ye tamtoghon to Maaron maau. Ve ighaze ngeu eta lolo pa

tonvetaz to Krisi maau ve ighamgham poian di maau, nene ye paam, tamtoghon to Maaron maau. *1Yo 2:29, 4:8, 5:18*

### *Lolood pa tauud*

<sup>11</sup> Sawa to aghur ila muun ve inim, yam alonloon saveen tovene: Iit irau lolood pa tauud ve tagham poian tauud. *Yo 13:34, 15:12*

<sup>12</sup> Tovenen iit tataghon Kain ngar toni malep. Ye, Ngeu Samia ighami inim le, tauto imundig ve irab sorokin tazi Abel imaat. Ve pughu vena to irabi imaat? Ye igham ngar tonenen pasa, ngar toni samia, ve tazi ngar toni poia ve denja ila Maaron mata. *Mbnp 4:8; Hib 11:4*

<sup>13</sup> Yam tonvetaz, ighaze yes to titaghon taan ngara tighur koi payam, runjamim iza ve agham ngar naol malep. *Yo 15:18+, 17:14; 2Tim 3:12*

<sup>14</sup> Iit tawatag: Iit tapul ataam to mateen wa. Ve aazne, tataghon ataam to Maaron tauto tagham nepoon poia ila toni. Pasa, lolood pa yes tonvetaz to Krisi ve taghamgham poian di. Ve ighaze tamtoghon eta lolo pa yes tonvetaz to Krisi maau, nene ye itaghon ataam to mateen. <sup>15</sup> Tamtoghon tisob to tighurghur koi pa tonvetaz to Krisi, nene Maaron ighita di tinimale ngeu to irab tamtoghon imaat. Ve yam awatag: Yes to tirab tamtoghon timaat, nepoon to mataad iyaryaar ineep todi maau. *Ga 5:19+; Syg 21:8*

<sup>16</sup> Sawa to Yesu Krisi ipul tau imaat pait, ye ipatoon ngar to lolood pa tamtoghon ivot ighazoon pait. Iit paam irau tataghon ngar raraate, ve tarei tauud pa yes tonvetaz to Krisi. *Yo 15:13; Ro 5:8; Ep 5:2*

<sup>17</sup> Ighaze ngeu eta le mbeb katindi to taan, ve ighita mbolaan igham tonvetaz eta to Krisi, eemoghon lolo isamini ve iuuli maau, nene pale vena? Ngar to Maaron to lolo pa iit tamtoghon ve ighamgham poian ghiit, ineep to ngeu tonenen? Maau.

<sup>18</sup> Ndinatug, ighaze tasavsaav sorok ila avood uli taghaze lolood pa tamtoghon, ve saveen toit le anonja maau, nene poia maau. Ngar tovene, nene kaarom. Iit irau tataghon saveen toit, ve tagham anonja ivot. Leso avood onoon. *Yems 2:14+,22; 1Pe 1:22*

*Ataam to tayoon ila Maaron mata toman tiniid iza*

<sup>19</sup> Tovenen iit lolood pa tamtoghon ve tagham poian di. Leso tawatag taghaze iit tataghon saveen onoon. Ve sawa to tayoon ila Maaron mata, iit pale lolood poia. Irau tamatughez ma mayaad ne maau. <sup>20</sup> Onoon, sawa pida, tayamaan tauud taghaze taneep denjaad ila Maaron mata maau. Eemoghon poia to Maaron, nene tiina kat ve ngar toni ilib pa ngar toit. Ighaze mataad kisin mbeb ru tonene, nene pale ipalot ghiit, lesa tamatughez pa tayoon ila Maaron mata sob.

<sup>21</sup> Yam ndiran tiou, lolog payam kat. Ighaze tayamaan tauud taghaze leed sosor eta ila Maaron mata maau, nene pale tamatughez pa tayoon ila mata maau.

*Ro 5:1; Hib 4:16, 10:22*

<sup>22</sup> Ve ighaze taghasoni pa mbeb eta, ye pale iloon ghiit ve igham pait. Pasa, mataad kisin tutuun toni ve tataghon di, ve taghamgham ngar to ighami lolo poia. *Mbo 34:15; Mt 7:7+, 21:22; Yo 9:31, 14:13*

<sup>23</sup> Tutuun toni, nene vene: Iit irau taghur ila to Natu Yesu Krisi, ve lolood pa tauud ve tagham

poian tauud itaghton tutuun̄ to Yesu tau isavia pait.  
<sup>24</sup> Tamtoghon tisob to matadi kisin tutuun̄ toni ve  
 titaghton di, yes pale tineep tun̄ia ila to Maaron,  
 ve Maaron ineep tun̄ia ila todi, ve tilup di tinim  
 ee moghon. Ve Avuvu to Maaron igham pait,  
 tauto igham ghiit taghilaal taghaze Maaron ineep  
 toman ghiit irau sawa isob. *Yo 14:23, 15:10; Ro 8:9*

## 4

*Tangabiiz poian saveen̄ to yes to tivovotia  
 Maaron aliḡa*

<sup>1</sup> Yam ndiran tiou, lolog payam kat. Aazne,  
 propet kaaromḡa naol tilaghlaagh izi taan. Tove-  
 nen ighaze tamtoghon eta isaav payam ighaze:  
 “You navotia saveen̄ itaghton pooz to Maaron  
 Avuvu.” Yam aghur ila saveen̄ toni rikia malep.  
 Angabiiz poiani: Onoon kat Maaron Avuvu igham  
 pooz pani, ma maau? *Mt 7:15; 1Tes 5:20+; 2Yo 7*

<sup>2</sup> Ataam to taghilaal yes to Maaron Avuvu igham  
 pooz padi, nene vene: Tamtoghon tisob to tisaav  
 ghazonḡa tighaze: “You naghur ila to Yesu Krisi  
 naghaze ye izi inim taan, ve inim tamtoghon,”  
 nene titaghton pooz to Maaron Avuvu.\* *1Kor 12:3;  
 1Yo 5:1*

<sup>3</sup> Ve ighaze tamtoghon eta isaav ghazonḡa tovene  
 maau, nene ye itaghton pooz to Maaron Avuvu  
 maau. Ye itaghton pooz to avuvu ite. Nene avuvu  
 to ipapazaagh tamtoghon ve tighur koi pa Yesu.  
 Muun̄, yam aloon̄ saveen̄a tighaze avuvu tonowen

---

\* **4:2:** Ataam ite to tator saveen̄ waaro tonene, nene vene:  
 Tamtoghon tisob to tisaav ghazonḡa tighaze: “You naghur ila to  
 Yesu naghaze ye Mesia to izi inim taan, ve inim tamtoghon,” nene  
 titaghton pooz to Maaron Avuvu.

pale inim. Ve aazne, ye inim ivot izi taan wa. *2Tes 2:3+; 1Yo 2:18,22; 2Yo 7*

<sup>4</sup> Eemoghon ndinatug, yam Maaron tamtoghon toni. Ve yam atatan ndiran kaaromŋa tonowen ve alib padi wa. Pasa, Maaron Avuvu to inepneep ila lolomim ne, tapiri ilib pa ye to ipapazaagh tamtoghon ve titaghon ŋgar to taan. *Yo 16:33; 1Yo 5:4+*

<sup>5</sup> Ndiran tonowen, gabuadi toman saveeŋ todi ipatoon di ighaze yes to taan. Tauto yes to titaghon ŋgar to taan, tilonlooŋ alinadi. <sup>6</sup> Eemoghon iit to Maaron. Tovenen ighaze tamtoghon eta iwatag Maaron, ye pale iloon alinamai. Ve yes to tiwatagi maau, nene tiloon alinamai maau. Nene ataam to taghilaal tamtoghon ve tawatag: Yes titaghon pooz to Maaron Avuvu to isasavia saveeŋ onoon, ma titaghon pooz to avuvu kaarom to ipapaghau tamtoghon pa ataam to Maaron? *Yo 8:47, 10:26+*

*Ighaze lolood pa Maaron, nene pale lolood pa tamtoghon paam*

<sup>7</sup> Yam ndiran tiou, lolog payam kat. Iit tasob irau lolood pa tauud ve tagham poian tauud. Pasa, ŋgar tovene inim pa Maaron. Tamtoghon tisob to lolodi pa nditadi ve tighamgham poian di, yes tiwatag Maaron. Ye igham di tinim paghu ve tinim ye ndinatu wa. <sup>8</sup> Ve ighaze ŋgeu eta lolo pa tamtoghon maau ve igham poian di maau, nene ye iwatag Maaron maau. Pasa, ŋgar to lolood pa tamtoghon ve tagham poian di, nene Maaron ŋgar toni. <sup>9</sup> Maaron imbaan Natu anonja ee moghon izi inim taan, lesu igham ghiit taneep poia itaghoni

taghoni gha ila. Nene ipatoon ghiit ighaze Maaron lolo pait kat. *Yo 3:16; Ro 5:8*

<sup>10</sup> Ngar to lolood pa Maaron ve tamtoghon, iit tataghoni iraua maau. Eemoghon Maaron, ye lolo pait kat. Aghita. Ye imbaan Natu anona ee moghon izi inim taan, ve imaat inim watoonrau, leso ireu sosor toit ve itatan mbalmbali to Maaron. *1Yo 2:2*

<sup>11</sup> Yam ndiran tiou, lolog payam kat. Ighaze Maaron lolo pait kat tovene, iit paam irau lolood pa tauud ve tagham poian tauud. <sup>12</sup> Onoon, tamtoghon eta ighita katin Maaron sone. Eemoghon ighaze lolood pa tauud ve tagham poian tauud, nene ipatoon ghiit ighaze Maaron ineep tunja inim toit, ve ngar toni to lolo pa tamtoghon ve ighamgham poian di, nene ineep ariana ila lolood wa.

<sup>13</sup> Maaron igham tau Avuvu pait wa. Tovenen iit tawatag: iit taneep tunja ila toni, ve ye ineep tunja inim toit. *2Kor 1:22*

<sup>14</sup> Tamaan Maaron imbaan Natu izi inim taan pa igham mulin iit tamtoghon to taan. Ve yei nighita katin uraat toni tonowen, ve nighazoon pa pughu. Tauto nipariaan saveena, leso aghur ila toni. <sup>15</sup> Ighaze tamtoghon eta isaav ghazona ighaze ye ighur ila ighaze Yesu, ye Maaron Natu, nene Maaron ineep tunja ila toni, ve ye ineep tunja ila to Maaron, ve yesuru tilup di tinim ee moghon. <sup>16</sup> Tovenen ngar to Maaron to lolo pait ve ighamgham poian ghiit, nene iit taghilaala wa. Ve taghur ila taghaze nene onoon.

Ngar to lolood pa tamtoghon ve tagham poian di, nene Maaron ngar toni. Tovenen ighaze iit

takis ngar tonene tunjia, ve tataghoni irau sawa isob, nene pale taneep tunjia ila to Maaron, ve ye ineep tunjia inim toit, ve itinja talup ghiit tanim ee moghon. <sup>17</sup> Ighaze takis ngar to lolood pa Maaron ve tamtoghon ineep tunjia ila lolood, nene sawa to Mboŋ Muri, iit pale leed matughezaan pa gabizoon to Maaron maau, ve tayoon ila mata toman lolood poia. Pasa, sawa to taneep izi taan, iit tataghon ngar to Krisi ighami. *Yems 2:13; 1Yo 2:28, 3:19+*

<sup>18</sup> Tovenen ighaze takis ngar to lolood pa Maaron ve tamtoghon ariana, nene irau tamatughez maau. Pasa, matughezaan pughu, nene vene: Tamatughez pa atia to sosor toit. Tovenen ighaze ngeu eta imatughez pa Maaron, nene ipatoonja ighaze ngar to Maaron to lolo pait kat ve igham poian ghiit, nene ye ighazoon pani sone. *Ro 8:15*

<sup>19</sup> Maaron lolo ineep toit ve igham poian ghiit muun. Tauto aazne, iit lolood pani, ve lolood pa tamtoghon paam. <sup>20</sup> Tovenen ighaze ngeu eta isaav ighaze ye lolo pa Maaron, eemoghon ighur koi pa yes tonvetaz to Krisi, nene ye ngeu to kaarom. Pasa, yes tonvetaz to Krisi, ye ighita katin di pa mata. Eemoghon Maaron, tamtoghon eta irau ighita maau. Tovenen ighaze ngeu eta lolo pa tamtoghon maau ve igham poian di maau, nene ye irau lolo pa Maaron paam maau. <sup>21</sup> Tauto Krisi ighur tutuun tonene pait: Tamtoghon to ighaze lolo pa Maaron, ye irau lolo pa yes tonvetaz to Krisi paam, ve igham poian di. *Yo 13:34+; Ep 5:2; 1Yo 3:11*

*Takis ghurla toit ariana. Leso tatatan ngar to taan*

<sup>1</sup> Tamtoghon tisob to tighur ila tighaze Yesu ye Mesia, Maaron igham di tinim paghu ve tinim ye ndinatu wa. Ve tamtoghon tisob to lolodi pa Tamaan Maaron, nene lolodi pa Maaron ndinatu paam. *Yo 1:12+*

<sup>2</sup> Ighaze lolood pa Maaron ve tataghon tutuun toni, nene pale tawatag taghaze iit lolood pa Maaron ndinatu. <sup>3</sup> Pasa, ataam to tapatoon tauud taghaze lolood pa Maaron, nene vene: Mataad kisin tutuun toni to naol ne, ve tataghon di. Ve tutuun toni, nene ipatajan pait pa tataghon di maau. *Mt 11:30; Yo 14:15,21+; 2Yo 6*

<sup>4</sup> Tamtoghon tisob to Maaron igham di tinim ndinatu, yes titatan ngar to taan. Ve ataam to tatatan ngar to taan, nene vene: Tayoon ariana ve takis ghurla toit tunja. *Yo 16:33; Ep 6:16; Syg 12:11*

<sup>5</sup> Sei masin irau titatan ngar to taan? Nene yes to tighur ila to Yesu tighaze ye Maaron Naatu. Yes moghon to irau titatan ngar to taan. *Ro 8:37; 1Kor 15:57*

*Mbeb pida to tipatoon Yesu tighaze ye Maaron Natu*

<sup>6</sup> Yesu Krisi izi inim taan ve inim tamtoghon, ve igham ya, ve sinj toni imalin ve imaat izala ai pambaroon. Tovenen ye igham ya moghon maau. Igham ya, ve muri sinj toni imalin paam. Ve Maaron Avuvu ipariaan Yesu saveen toni paam, leso taghur ila. Pasa, ye isasavia saveen onoon.

<sup>7</sup> Tovenen mbeb tol to tipariaan ghiit pa taghur ila to Yesu, nene vene: <sup>8</sup> Avuvu Patabuan, ya, ve sinj. Mbeb tol tonene, ngaradi raraate. <sup>9</sup> Sawa



naol, iit taghur ila saveen to tamtoghon tisavia pa tipariaan nditadi saveen todi. Eemoghon Maaron, ye ilib pa iit tamtoghon kat. Tovenen ighaze ye ipariaan saveen to Natu, iit irau taghur ila kat. *Yo 5:32+, 8:17+*

*Ighaze taghur ila to Yesu, iit tagham nepoon poia ila to Maaron wa*

<sup>10</sup> Ighaze tamtoghon eta ighur ila to Maaron Natu, ye pale iyamaana ila lolo ighaze saveen to ye ighur ila, nene onoon. Ve ighaze tamtoghon eta ighur ila toni maau, nene ye iveleg Maaron ighaze ye avo kaarom. Pasa, saveen to Maaron isavia pa ipariaan saveen to Natu, nene tamtoghon tonenen ighur ila maau. <sup>11</sup> Saveen tovene: Nepoon poia to isenseennga gha ila, nene Maaron igham pait wa. Nepoon tonowen, taghami ila to Natu. *Yo 1:4, 17:3*

<sup>12</sup> Tovenen tamtoghon to ighaze igham Maaron Natu, ye igham nepoon poia ila to Maaron wa. Ve tamtoghon to ighaze igham Maaron Natu maau, ye igham nepoon tonowen sone. *Yo 3:36, 5:24*

<sup>13</sup> Saveen isob tonene, you nambooda ilat to yam tamtoghon to aghur ila to Maaron Natu, leso awatag kat aghaze yam agham nepoon poia ila to Maaron wa. Nepoon tonowen pale iseenga itaghoni taghoni gha ila. *Yo 20:31*

<sup>14</sup> Tovenen iit tamatughez pa ghasoniin Maaron pa leed mbep malep. Pasa, ighaze taghasoni pa mbep eta itaghon ye lolo ve ngar toni, ye pale iloon ghiit ve igham mbep tonenen pait. <sup>15</sup> Ve iit tawatag: Maaron iloon sunuun to it irau sawa isob.

Tovenen ighaze iit taghasoni pa mbeb eta, ye pale iloon sunuun toit ve igham pait. *Yo 14:13, 16:23*

<sup>16</sup> Ighaze iit taghita tonvetaz toit eta igham sosor to Maaron irau ireua, iit irau tasun Maaron. Leso igham mulin tamtoghon tonenen, ve imuul inim pa ataam to taneep mataad iyaryaar. Ve yes to tipul muridi pa Krisi ve ngar todi iyaryaan kat, nene leg saveen eta padi maau. Ndiran tovene, irau taghason Maaron padi maau. Pasa, yes ledi ataam eta muul maau. Muri, yes pale timaat ve tilaledi. *Hib 6:4+, 10:26+*

<sup>17</sup> Onoon, ngar samsamia to naol ne, nene sosor. Eemoghon sosor pida irau tigham ghiit tamaat ve talaleed maau.

*Yoan ipasob saveen toni*

<sup>18</sup> Iit tawatag: Tamtoghon tisob to Maaron igham di tinim paghu, yes tinoknok ghamuun ngar samia maau. Pasa, Maaron Natu mata padi ve injin di. Tovenen Ngeu Samia irau iwaghamun di maau. *1Yo 3:9*

<sup>19</sup> Ve iit tawatag: Iit tamtoghon to Maaron. Eemoghon ival tiina to taan, yes tineep ila Ngeu Samia nima, ve ye ighamgham pooz padi. <sup>20</sup> Ve iit tawatag: Maaron Natu izi inim taan, ve ipaghazonan ngar toit, leso tawatag katin Maaron tau. Tauto aazne, iit taneep ila to Maaron tau ve Natu Yesu Krisi, ve itiija talup ghiit tanim ee moghon. Yesu Krisi, ye Maaron tau. Ve ye to inim pughu pa nepoon to mataad iyaryaar. *Yo 17:3*

<sup>21</sup> Ndinatug, matamim imosmoos pa taumim, ve aneep sagan pa maaron kaaromja tisob. *1Kor 10:14; 2Kor 6:16*

**Maaron Saveen Toni Patabuan**  
**The New Testament and portions of the Old Testament**  
**in the Oov Dialect of the Saveeng language of Papua**  
**New Guinea. The Saveeng language is also called Mutu**  
**or Mutu-Tuam.**

**Sampela hap Buk Baibel long tokples Saveeng Oov**  
**long Niugini**

copyright © 2011 Wycliffe Bible Translators, Inc.

Language: Saveeng (Mutu)

Dialect: Oov

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-24

---

PDF generated using Haiola and XeLaTeX on 22 Feb 2024 from source files dated 31 Aug 2023

c7a45d99-91a2-564f-9c55-d2efc8be7fae